



Pou Piblikasyon Imedya: 21/06/2023

GOUVÈNÈ KATHY HOCHUL

**GOUVÈNÈ HOCHUL AK MAJISTRA ADAMS ANONSE LANSMAN KAMYON
PWOGGRAM PATWOUY LOKAL IJANS SOU OTOWOUT NAN STATEN ISLAND**

Init sèvis ijans gratis bò wout la pral deplwaye pandan moman ki gen plis vwayaj yo

Gouvènè Kathy Hochul ak Majistra Vil New York Eric Adams te anonse jodi a pwogram Patwouy Lokal Ijans sou Otowout la, ki ofri asistans bò wout pou otomobilis ki nan detrès, ap agrandi pou l sèvi Staten Island. Apati kounye a, kamyon HELP (Highway Emergency Local Patrol) ki gen anplwaye sivil ki fòme ak sètifye nan Depatman Lapolis New York (New York Police Department, NYPD), pral opere sou Otowout Staten Island pandan moman ki gen plis vwayaj lasemèn yo. Kamyon yo pral patwouye toulède direksyon otowout la ant Lily Pond Avenue ak Goethals Bridge soti 6 a.m. rive 12 p.m. ak apati 2 p.m. jiska 8 p.m., lendi jiska vandredi pou ede otomobilis ki gen difikilte mekanik oswa ki te enplike nan ti aksidan. Avèk lansman jodi a sou Staten Island, pwogram HELP ki koute 3.2 milyon dola pa ane nan tout vil la ap ogmante nan 23 kilomèt wout ki gen patwouy ak de kamyon adisyonèl.

"Ekspansyon sèvis enpòtan sa a nan Staten Island vle di plis asistans pou otomobilis sou Otowout Staten Island lan, ki ofri yo asistans gratis bò wout pandan moman ki gen plis vwayaj yo", **Gouvènè Hochul te deklare**. "Mwen remèsye Majistra Adams ak NYPD pou patenarya yo nan inisyativ sa a, ki vle di ke gen plis èd toujou ki nan wout pou otomobilis Staten Island yo".

Majistra Vil New York, Eric Adams, te deklare, "Lè nou pote pwogram HELP nan Staten Island, sa pral ede Nouyòkè yo rete an sekirite sou wout nou yo avèk sèvis ijans serye chak fwa sa nesesè. Pwogram HELP la bay asistans gratis bò wout ak chofè ki sou wout kle yo ki gendwa bezwen èd, epi agrandisman sa a pral pèmèt nou reponn rapidman a ensidan sikilasyon yo epi kenbe wout nou yo lib, ekonomi nou an ap vanse, epi chofè nou yo an sekirite".

Komisè Depatman Lapolis New York, Keechant L. Sewell, te deklare, "Sekirite sikilasyon se sekirite publik. Agrandisman pwogram patwouy lokal ijans sou otowout la se yon eleman enpòtan nan efò NYPD pou kenbe wout nou yo an sekirite, epi mwen vle remèsye Majistra Adams, Gouvènè Hochul, Depatman Transpò Eta New York, ajan

devwe yo k ap fè aplike lalwa nan sikilasyon NYPD, ak tout moun ki te travay pou rann ogmantasyon pwoteksyon sa a posib".

Chèf Transpò Depatman Lapolis Vil New York Ia, Kim Royster, te deklare, "Jodi a se yon gwo jou paske NYPD ak Depatman Transpò Eta a ap vanse ak ekspansyon Pwogram Patwouy Lokal Ijans sou Otowout la. Wi, kamyon 'HELP' ap vini nan minisipalite Staten Island. Kenbe tout itilizatè wout yo an sekirite se misyon prensipal Biwo Transpò NYPD a ak ajan nou yo k ap aplike lalwa nan sikilasyon se yon pati entegral nan misyon sa a. Yo sèvi kòm je ak zòrèy NYPD".

Pwogram HELP bay asistans gratis bò wout pou machin an pàn yo sou wout ki seleksyone ak gen gwo volim atravè eta a. Kamyon yo ekipe pou jere yon lis debaz aktivite antretyen minè pou swa pèmèt yon machin ki an pàn soti nan liy vwayaj la epi/oswa fè I vin fonksyonèl ankò. Operatè kamyon HELP yo gen kapasite pou ede otomobilis yo nan plizyè fason, tankou retire machin ki an pàn nan liy vwayaj akòz aksidan minè ak pwoblèm mekanik. Yo ka chanje kawotchou, demare yon batri, tanporèman reparé yon tiyo radyatè, osi byen ke fè lòt reparasyon minè. Operatè yo ka bay otomobilis yo likid refwadisman pou yon radyatè, de galon gazolin pou pi plis, ak menm direksyon ak wout altènatif, oswa itilizasyon yon telefòn selilè pou piblik la ka fè yon apèl lokal.

Yo ofri sèvis yo gratis pou otomobilis la. Chofè HELP p ap aksepte gratifikasyon, yo p ap rekòmande antrepriz remokaj ki pa kamyon remokaj NYPD ki otorize pou otowout sa a, oswa yo p ap rekòmande antrepriz reparasyon/kawosri. Lè nou gen kamyon HELP k ap travay sou plas pandan peryòd vwayaj yo, epi ap fè patwouy nan zòn pwoteksyon espesifik yo, ensidan yo ka abòde pi vit epi ak yon fason efikas. Anplis de sa, patwouy HELP disponib pou sipòte jesyon ak liberasyon gwo ensidan, tankou yon wout fèmen akòz yon aksidan nan sikilasyon.

Depi lansman li an 1994 avèk misyon pou fasilité mouvman an sekirite ak efikas moun ak machandiz nan minimize blokis sikilasyon ak amelyore operasyon sistèm otowout la, pwogram NYS HELP te ede plis pase 65,000 otomobilis nan tout eta a chak ane. Nan Vil New York, kamyon sèvis HELP wouj, ble ak blan yo se manm sivil Depatman Lapolis New York ki byen fòme ak sètifye. HELP se yon eleman entegral nan Pwogram Jesyon Ensidan NYSDOT a, ki ankouraje patenarya ak ajans ki aplike lalwa lokal ak nan tout eta a ak ajans entèvansyon ijans. Pwogram HELP NYSDOT la vin tounen youn nan pi gwo pwogram patwouy sèvis sou wout ki gen plis siksè nan peyi a. Nan tout eta a, pwogram nan koute 12 milion dola chak ane.

Komisè Depatman Transpò Eta New York Ia, Marie Therese Dominguez, te deklare, "Gen jis kèk bagay ki pi estresan oswa ki pi dekourajan pou otomobilis pase yon pàn mekanik sou otowout la, epi kamyon HELP nou yo ka ede yo retounen sou wout la san danje epi ak mwens reta posib. Nou kontan anpil pou nou pote sèvis sa a ki esansyèl anpil sou Otowout Staten Island lan epi nou ofri yon koutmen pou vwayajè ki nan bezwen sou youn nan wout ki pi mouvmante nan rejon an".

Manm Asanble Sam T. Pirozzolo, te deklare, "Mwen kontan wè pwogram HELP la ap agrandi pou l'enkli Otowout Staten Island lan. SIE (Otowout Staten Island) a se yon wout vital pou plizyè milye abitan Staten Island, sitou nan lè prese yo. Gen sipò siplemantè pwogram HELP yo ki disponib pou chofè yo gen posiblite pou elimine ensidan yo pi vit epi anpeche plis blokis. Mwen pa ka tann pou m wè rezulta pwogram HELP la ap pwodui".

Manm Asanble Michael Reilly te deklare, "Mwen vle remèsyé Gouvènè Hochul ak patnè nou yo nan NYSDOT paske yo elaji pwogram HELP la nan Otowout Staten Island. Sa pral pwouve li se yon fason pratik ak responsab pou gouvènman an adrese blokis epi mwen espere wè li elaji nan rezo nou yo nan yon avni ki pwòch".

Manm Konsèy Kamillah Hanks te deklare, "Anons jodi a make yon etap enpòtan nan direksyon pou amelyore sekirite ak byennèt otomobilis yo nan Staten Island. Avèk ekspansyon pwogram Patwouy Lokal ljans sou Otowout la, n ap priyorize asistans ak sipò alè bò wout pou moun ki fè fas ak difikilte mekanik oswa aksidan minè. Mwen bat bravo pou efò Gouvènè Kathy Hochul, Majistra Eric Adams, ak tout moun ki enplike nan rann ekspansyon sa posib, pandan n ap kontinye priyorize byennèt rezidan ak vizitè nou yo nan Staten Island".

Manm Konsèy Joseph Borelli te deklare, "Pa gen anyen ki jennen sikilasyon ak deranje yon trajè plis pase yon machin bloke oswa yon ti kolizyon ant machin. Kamyon HELP sa yo pral ede relanse sikilasyon an ankò pandan y ap fè wout yo vin pi an sekirite pou tout moun".

Pwokirè Distri Konte Richmond an, Michael McMahon, te deklare, "Otowout Staten Island se atè vital nou ki konekte nou ak rès Vil New York, New Jersey, ak lòt pwen yo. Kidonk, lè yon kolizyon jennen sikilasyon pou plizyè kilomèt epi libere li pran plis tan pase sa li ta dwe, li kite vwazen nou yo ak vapè k ap soti nan zòrèy yo epi li ka mennen nan konpòtman kriminèl raj sou volan ki mete sekirite moun ki sou wout la an risk. Mwen kontan aprann ke kamyon HELP yo pral tounen yon enstalasyon prèske pèmanan sou Otowout la epi mwen apresye enklizyon Staten Island nan pwogram sa a gras ak Gouvènè Hochul ak Majistra Adams".

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)